

永濟縣志

第十冊

永濟縣志卷之十九

藝文

明

重修文昌桂籍閣記

許希孟

蒲城之東自條西迤邐平阜出三乳峙州城爲左岸阻山帶河凌而窺之則勝概畢集南一區差廣先是達識者改嶽廟爲書院厥後人文遂丕著至今增修益麗章華益炳煥北一區爲普救之故迹中建一浮圖層崇數丈逼霄漢鈴鐸百夥振音響風水家以爲左書院而右浮圖聲名文

華之象筆穎之峰也中一區差小夾兩大而居然獨尊
封太傅楊豸史公洞觀之以爲斯地處兩乳之間而據其
脊蓋陰陽之會盤拱之交也於是爰創厥始建文昌司祿
之祠且曰普救之浮圖爲斯文之筆峰則大手筆之掌握
非文昌君莫主也吾州之文筆自是其益大而興乎于是
捐己資飾公地廓然而文大同之盛舉門垣堂宇肅然以
備于其堂之後築基爲桂籍閣因以推文昌君之孝以奉
乎聖父母嗚呼眞勝心哉所洞見者一州之大勢所創舉
者一州之共祠所以仁後學啟華耀者又非止一家一時

之良圖且並以推神孝以祈靈豸史公大有造於人哉自
乙卯變坤軸而祠制咸圯覆今太傅冢宰公居朝不忘念
欲爲復飾以隆先志其仲子春元公則力任之資需材用
礪鍛土石雖亦事眾券而自備爲多仍成其閣爲桂籍上
祠以聖父母而下列州郡先達鄉會試之名題于其石鳴
呼眞世有聖心哉祖爲斯文而創之子爲斯文而軫恤之
孫爲斯文而頓飾之一祠之建萬代之瞻仰也一國之築
萬類之永錫也一家之大道萬姓之共由也嗚呼楊氏世
有大造于人哉雖然此亦自建祠一閣之意而見其一節

至若身史公文政被江蜀文教淑生徒猗歟盛矣太傅公
宿德推于海內重望兼乎夷夏行將入相輝文治之華以
遍天下及後世並春元公得志而大行則其爲文也豈止
大造于茲郡哉孟秋觀成之際爲記其世德世念之盛如
此若夫桂籍之名義則百官之統科第祿秩名籍之附屬
而楊氏職業事類之相符合其與文昌君又若爲後先之
化澤故併記之

淨土寺記

山陰府嗣王

朱俊柵

予早歲讀儒書二十閱道典三十閱釋典乃知釋其上乘
矣或曰釋老異端奚尙爲予曰異端之說見於孔子攻乎
異端之訓謂其道異於吾者爲異端後世以楊墨指之按
魯史載楊墨在孔後孟前是楊墨未生而先有異端矣以
異端指楊墨以楊墨指釋老排排任情漫無證據竊聞古
有佛日道月儒星之說謂三光同一名三聖同一道無少
異者嘗思孔子毋意必固我顏子坐忘屢空他如關尹莊
列之書皆同佛旨後儒動引韓昌黎人其人火其書廬其

居而不知柳柳州意若薄之乃謂佛書與易論諸書合近代王陽明本出於禪乃曰佛老之道與聖人間相出入而卒所不同者有自私自利之心夫佛嘗願與眾生同得菩提豈自私自利者茲特妄駁以撫世譏耳嗟夫道之大也籠天地貫塵劫無分夷夏無間古今奈何一區之士爲教所束而不能超悟日逡巡偵佔於三氏之間欲支而異之而無可異欲比而同之而不敢同役役然終其身支吾含糊以使家裂而族析之良可悲夫是固難與齷齪者道也隆慶初僧明淨者貌朴性淳遊方止蒲卓錫於中條山蓮

花蔓俗名八峰砦士有王世相者感夢發心爲淨創蘭若
以居費資凡數百金相爲太保襄毅公族其爲指畫資施
多賴於公故規址潔清誠靈境也其中建洞塑大悲菩薩
像上建佛閣前水陸殿左右禪堂廚舍其地上至青林山
頂下至皇甫經地東至石莽嶺西至澗工興於隆慶竣於
萬厯淨向余乞寺名予命名曰淨土且鳴道紀績於石明
淨號法堂河南永甯人受菩薩戒人皆推重世相號西溪
郡之名族尙義樂施以行眾善特並記之

創建泓龍廟樂樓饗殿記

山陰榮靖王

朱成鏊

蒲郡治東一舍許趙伊之南卽條山焉巍峩萬仞翠屏雙
立瀑布飛流淙韻數里銀浪穿空青怪石壓后土攀緣石
磴千步可至泉下泉側有古五龍祠邦人旱潦懇禱靡不
響應昔成化癸卯天道亢百穀稿人相食者三歲繼之宏
治改元戊申次年己酉春不雨郡佐陳公卣奮好生之心
率居民披髮跣足懇禱祠下倏爾陰雲四布清風徐來霖
雨霏霏化育生仁轉殃爲福矣歲終粟麥賤直官民釋憂
民興義讓風俗丕變若西伯之化然微陳公烏有是與古

人云有衣冠者有禮義有飲食者有廉恥信不謬也矧龍之爲物稟得乎陽象取於乾變化莫測至剛至健貫金石任小大治人物易生死非精誠純潔者弗能易易以感之今去陳公四十年餘設有陳公之志誠而必成此休徵者耶嗚呼但未之見耳頃有隱子陳周道自然其號者來自關中樂遊名山登謁祠下邂逅逸士魏國璋相語歡如也蓋非故識實類聚耳盤桓放適言及陳公禱雨事自然子倍益寅畏曰神有佑人之德祠將傾奚不新乎魏曰合民夙願第未有協之者幸君不棄少憇泉石遂給州帖請文

以專陳子於是導化愚庸啟事神之念集眾資新祠宇俾
龍神享格致雨暘時若以復陳公之嘉豈非躋與自然子
唯唯之從翌日父老相傳不無優贊蓋一人之心千萬人
之心也倡者多和者眾近者悅遠者從不日財贍而構料
鳩工殿宇臺榭悉易而新之又墾祠面巉崖移建樂樓以
擴其襟抱損高增卑鑿石作柱和泥爲瓦煉石爲灰又益
饗殿七楹視昔尤爲宏敞閱數月廟貌煥然一新瞻拜者
凜然生畏肅然儀寅而神安民安昭著於此焉邇獲時和
歲豐家給人足未必不由龍神格廟而陰佑之所致也始

工於嘉靖九年二月五日訖工於十三年重陽日具載於
郡守楊公儒魯之梁記云自然子欲鐫石記其事俾後人
觀覽者感發興起繼而修葺則是祠之新千古如一日焉
噫用心之勤圖治之遠益可見矣自然子偕友國璋卑禮
之勤徵其文於余余曰宿儒滿前甲第連郡安敢僭踰國
璋曰王子食祿是邦庸忍默乎余受此言弗克辭故爲之
記云

重修二賢祠記

刑部員外郎 薛 樞

州治東南山曰首陽巔有商之夷齊二賢祠內有二冢徵諸郡志卽二賢墓也殿堂廳門舊計九間厯年旣久桶瓦腐圯且制度狹隘不足周旋成化丁未按治山右侍御肅甯張公泰階外臺僉憲陝右王公存禮行部至州禮謁二賢祠下顧瞻良久乃進州守淮陽許君鵬泊判官永平陳君貞而諭之曰皇上紀元之初大詔天下名臣賢士墳墓俾所司卽齊修理毋令廢墜矧夷齊二賢清風高節有關於世教民風也甚大今祠宇若此何以虔祀安神宜加飾

焉二君唯諾而退遂鳩材庀工棟宇腐圯易以新好恢括舊制增兩廡廳廈共計十間豎扁一牲所六間扁一齋所六間扁一墓扁一祠扁一東西清風高節扁共二碑亭二間井亭一間周圍列垣墉以丈計共二百有奇南北長闊以丈計九十有奇較之舊制奚啻十倍又樹柏百有十株昔所有者飾之昔所未有者增之規模宏闊克稱祠宇之雄工告成許君來請余文以記其事夫夷齊二賢孔子許以仁孟子稱以聖固不容贅竊謂世之受耳目風紀之寄而於風化所關漫不加意殊不知樹乃風聲則頑者不激

而自廉懦者不植而自立愚者不斲而自振風紀所先孰
要於此二公意有在矣許陳二君又能協厥心德不科於
民克成其事是可書也乃繫之以詩曰

翼翼祠宇首陽之巔厯歲既久風雨彫穿制且狹隘有礙
周旋大廷有命表厥名賢矧此夷齊仁聖孰先內外臺憲
風化是研遂令有土斬木陶甄恢拓舊制崇焉遂焉遐邇
快睹誰不興憐首陽可仆黃河可涓清風高節日月同懸

